

四庫全書

集部

欽定四庫全書

石倉歷代詩選卷一百八十一

明 曹學佺 編

宋詩五十八

劉子輦

遊龍潭

四客同笑言一僧陪杖屨徜徉山水窟適意忘晨暮疎
鐘巖北寺細竹溪南路中流石參錯不礙潺湲潏泓澄

小龍潭潤氣金碧聚時驚木葉墜俯見儵鱗度斯遊非
預期偶爾造佳處幼興丘壑情陶令琴觴趣淹留慰所
願惟以賓友故夕陽淡寒山遲回不能去

巡寨偶書

窮寇轉趨海吾邦備宜先連年戎役頻徵兵及漁佃扶
戈或推齒嬰胃仍華顛未知戎伍肅朱旗亂長吁林端
晚燧發石際飛梯懸崎嶇樵牧地萬竈生浮煙我行視
營柵兒戲端可憐倚茲形勢險寇至常遷延羣兇昔吾

軍赤指抨鳴弦防胡屢瓦解合寇俄星連猶多燕趙兒
意氣非當年駢車載珍寶結騎馳嬋娟時危天稔亂事
豈汝能專怒風飛驚濤河梁失歸船四顧天地黑攬衣
思茫然

春寒偶書

浮雲匿晨暉雨雹驚春晝天公號令乖陰晴變何驟小
徑踐芳泥通渠走寒溜風顛萬木偃氣凜孤闌透鳴鸞
護巢翔奈此羣雛幼擁爐烏薪然雙手慵出袖褰幃望

空明屋角見遙岫良朋不可招塊處慚孤陋青青桃葉
長奕奕蘭花秀長吟曷咨嗟佳辰去難又

入白水訪劉致中昆仲

夜雨歇清曉山椒雲氣昏駕言聊出遊窈窕窮川原側
帽避橫篠揚祛障晴瞰春泉散石壁細草羅丘園陟峻
已逾嶺窺深更緣源喬松旁澗折垂柯激潺湲過嶺寒
慘慘驚林白翻飀造幽景寥閼勝絕難具論僕夫知余
樂跼蹐為停軒惜無徒倚地時來此開尊暮投鷺峰宿

青燈耿柴門相從二三子交情久彌敦談玄測象象攬
佩紉蘭蓀願言固所懷丘壑吾道尊

攜筇

晨起偶無事携筇出潭川翩翩雙鳬飛宛若導我前林
靜滴殘雨村深澹寒煙當春足膏澤俯夏餘清妍野溜
綠交貫山花紅接連雄觀發新奇勝地窮攀緣據石弄
驚急班荆蔭連卷幽懷脫塵拘如超混芒先向令作興
來未必勝偶然榮觀事多乖內取樂乃全他時誰繼遊

此意遙相傳

和李巽伯春懷

山寒古寺清
斷續春朝雨
遙憐遠客情
寂莫誰晤語
平生氣軒昂
失意今易與
有酒即佳辰
無兵皆樂土
微吟對節物
林靜幽花吐
悠悠念鄉邑
耿耿悲豺虎
知有濟時才
從橫在談麈
功名恐未遲
老翮期更舉

懷致仲

夢覺殘夜永
山寒氣逾清
林幽萬籟息
月出虛堂明
披

衣坐復起懷人思空盈經時不對面素榻浮埃生遙知
念盍簪臨風亦關情寒幃望歧路慨然欲宵征無人導
我先何因識門庭仰憑鴻雁飛書詞寫深誠詞多意莫
宣益遣幽恨并

雙樹

猗猗映門樹團團若雙蓋微風薄層霄髣髴遞清籟逍
遙步其下秀色吾所愛秋來霜葉紅飄落不相待

途中

小市猶依海橫橋欲跨汀雨餘榕徑冷春晚芋田青薄
宦低豪氣浮生惜壯齡急流歸亦好憂患飽曾經

次韻張守秋懷

杖藜乘興出佳處每關情白石溪流淺黃花籬落青林
煙經雨薄野日傍山明賴有杯中物愁懷得暫平

與原仲至交溪橋

倦憇春橋午回環翠碧重亂溪流背海新柳色欺松厭
市常思野為官不及農喜逢湖上客談話得從容

道中

微風收宿靄細路遠平皋石亂春溪急山寒曉月高鳥
聲時出樹花氣欲侵袍行役兼清賞驅馳未覺勞

寄蜀

有客傳歸信愁懷得暫寬兒童占鵲喜鄰里借書看離
蜀秋方半浮湘歲欲闌柴門頻灑掃夢想見征鞍

訪原仲仙居

寂寂臨湖屋湖風為掩門鳥聲幽谷樹山影夕陽村好

事長留客雖貧亦置樽平生孤淡意去此欲誰論

致明攜酒來雲際

有客携家釀敲門訪病翁一春寒食過幽寺晚晴中嫩
竹扶簷綠殘花蓋地紅牢愁賴君破歸意莫忽忽

過致思新齋

酷愛鶯溪水潺潺傍馬流落梅寒崦靜啼鳥暮村幽我
病今朝已君家有酒不新齋最奇絕差得少淹留

寄張子平

老矣張平子飄零客此州清樽如有伴白髮不知愁
雨燕梢簾入風花擁檻浮夢中家在否歸興莫悠悠

晚飲

招提聊駐屐却去白雲堆老眼看山倦餘懷向酒開
晚涼微雨送秋意一蟬催醉裏揮犀妙方知有逸才

次韻長河壁間韻

竄鼠驚殘夢蕭蕭老屋虛風聲傳遠瀨寒意入秋蔬
客路漂搖久歸身憔悴餘西窗滿殘照髣髴似吾廬

望京謠

雙鑾北狩淹歸轂寂莫梁園春草綠猶傳故老守孤城
官軍不到黃河曲連雲樓櫓已灰燼更倚窗扉防箭鏃
招兵大半出羣盜繡襦蒙衣屢飜覆前宗後社力誅鋤
白刃如霜挂人肉州橋燈火夜無光夾道狐狸晝相逐
往時汴泗絕行舟市糴十千塵滿斛衣冠避敵多在南
北馬卻食江南粟誅臣武士力俱困海角飄搖轉黃屋
盤庚五遷方擇利昆陽一戰何當卜懷王作客寧不歸

漢祚承天終必復夕烽明處望千門孤臣祇欲吞聲哭

明皇九馬圖

書生兀兀園不窺見馬豈辨騮與騅開圖九駿立突兀
模襍知是真龍兒奔雷蹴踏原野動曳綬慘錯風沙隨
華纓金絡豈不好矯首奮迅那容羈吾聞取驥如擇士
競愛妥帖驚權奇士懷倜儻衆論斥馬有憔悴羣鴛欺
六閑養養固恩厚橫氣摧折常鳴悲丹青儻不逢妙手
萬世豈識真龍姿因思中原政格關鐵騎倏忽銀山移

著鞭安得致此物掩卷四顧徒歔歔

次韻蔡學士梅詩

梅梢破白香清切清雨含春不成雪瑤池髣髴萬妃遊
縞屢練悅何鮮潔凌晨燦爛忽驚眼客中又過嘉平月
年年見梅非昔地海角尋芳更愁絕多情欲伴曉雲飛
有恨只教啼鳥說兵厨況是酒如澠東閣喜聽談吐屑
飄零使我歡意盡山城暮角聲嗚咽庭邊一樹春最晚
照影遙憐水方折暫忙不到今幾時南北枝頭開又歇

新辭婉媚發春妍未害廣平心似鐵

荔子歌

炎精孕秀多靈植荔子佳名聞自昔絳囊剖雪出瑯盤
尋常百果無顏色閩天六月雨初晴星火熒煌曜川澤
欵如彩鳳戲翱翔爛如彤雲堆翕赫我聞二和全盛時
貢輸不減開元日繡衣中使動輜車黃紙封林遍阡陌
浮航走轍空四郡妙品人間無復得似聞供御只纖毫
往往盡入公侯宅驪山廢苑狐兔靜艮嶽新宮鞀鼓急

繁華今古共淒涼
遶樹行吟悲野客

法石見李漢老參政

我識今朝李翰林
十年隔絕飛寸心
素書每逢雙鯉得
雲路欲倚長梯尋
翰林昔叅建炎政
想見中興人物盛
方圓齟齬不足論
角巾雅有江湖興
玉堂草詔褫兇魄
丹陛陳謨發天聽
介圭便合趣公還
只今密勿才稀並
自憐隨牒東南奔
假道因得登龍門
怪余髯面益老矣
一笑問勞情彌敦
僧坊蕭蕭遠闌闌
豈料飄零獲清對

牛行尚憶王相宅曩日交游幾人在濁酒青燈夢寐間
九州四海煙塵內區區王事今有程暫見復別難為情
長亭喚馬一悽斷壁月曉墮桐花城

夢仙謠并引

劉致明夢與七客游仙胡原仲與焉其事甚異致
明清修純實非夸誕人也因為作謠以記之他時
二人凌太虛誦此謠當懷所謂病翁者耶

鷺子峰前波色清劉郎看山無俗情癯儒自昔有仙骨

夜夢體飛如葉輕雲中不識朝天路雙童導我凌空去
側身度巖隈盤盤復回回脩然意往形不礙石窟鮮竇
俄天開乘槎夜泛牛女渡鞭鸞曉入金銀臺花深不逢
人時聞佩環聲仙翁睡起方結襪見客坦易無崖垠擊
蒙異垂矜叩妙獲一言駐紅却白非難事貪生慮死真
愚計當時同遊七姓俱但記古月成胡宇塵緣未斷不
得留海風吹過蓬瀛洲覺來窗戶冥矇曉玉鏡晶晶墮
松杪

夜過王勉仲家宿酒數行為作此歌

遙林帶雪迷村畔伶俜一馬行無伴
故人家住丁坂頭停驂邂逅成清款
犯寒如我猶空腹地爐然薪架紅玉
花瓷湯酒欲生香竹外庖厨聞剝肉
夫君不有中饋賢咄嗟辦此何神速
酒酣意氣悲荊棘尚憶朱甍舊時宅
豺狼得志竟何成至今人骨如霜白
亂離少有闔門在漂蕩俄驚五年隔
數畝荒田已失耕一間茅屋仍留客
客情主意歡難盡短臘窮冬春欲近
明朝分手更愁人

且覆清觴莫留賸

書事

黃河鑿鑿水成路
人語寒空氣成霧
此時泣血念鑿興
玉體能勝凜冽無
蒼黃天步蒙塵去
畫袞飄零傷歲暮
飛書倘未伐姦謀
我服雖華何忍御

清江行

漁翁一棹老清波
稚子學語能漁歌
日暮沙頭寒熱竹
雨餘船角亂堆蓑
驚殘小鮮仍自鱸
湖海茫茫醉鄉內

夜闌酒渴漱寒流月照蘆花上蓬背

次韻張守壺山詩

松根繫馬望巔屹乘興攀躋不作難日出漸看林霧散
潮來先覺海風寒遙連釣石多紅樹半出僧垣盡綠竿
不見雙旌來視稼憶君對酒豈能歡

次韻陳成季郡會

疾雨狂風恨若何芳辰坐覺等閒過惜花意欲春長在
對酒年來飲不多雅會欣聞珠履集新詞好付雪兒歌

風流閣老推前輩喜客溫顏似醉醺

北風

雁起平沙晚角哀北風回首恨難裁
淮山已隔邊塵斷汴水猶穿故苑來
紫色蠅聲真倔强翠華龍袞暫徘徊
廟堂此日無遺策可是憂時獨草萊

同原仲茂元致和入開善

寒聲蕭蕭霜葉秋石路礚礚穿林幽
雲橫遠岫若平斷風約小溪如倒流
偶經名藍亦終日喜有勝士同茲遊

移牀果茗咄嗟辦曳杖欲歸仍更留

原仲溫其彥藻彥符致明集敝廬

清樽勸客且留連
亂後相從亦偶然
三徑生涯鄉社裏
一秋心事菊花前
向來憂喜皆陳迹
老去光陰逐斷弦
懷抱故人今有幾
只因情話可忘年

宿雲際偶題

穀雨都無十日間
落紅棲草已斑斑
曉煙未放屋頭樹
春漲欲浮天際山
翠蓋縈風沈遠坂
漁舟驚浪落前灣

鐘聲認得林邊寺歲歲籃輿獨往還

次韻原仲幽居

貴賤營營各有求柴門晝掩靜幽幽讀書無效空千卷
學稼雖勤火一丘感慨舊餘王粲賦棲遲今倦長御遊
幔亭莫失春風約我亦身如不繫舟

屏跡

屏跡山樊避世喧晚風落日靜柴門寒泉遶竹通幽圃
小徑穿田入別村散策微吟霜葉脫鉤簾宴坐碧雲翻

閒中興味知何晚絕口名途不更言

山寺見牡丹

倦遊曾向洛陽城幾見芳菲照眼新
載酒屢穿卿相圃
傍花時值綺羅人
十年客路驚華髮
回首中原隔戰塵
今日尋芳意蕭索
山房數朶弄殘春

送六四叔之茶陵

底用怱怱便據鞍
離觴縱滿不能歡
瀟湘萬里客愁遠
鴟鳩一聲春事闌
此去宦遊當益顯
時來功業自非難

似聞幕府資奇畫好借雄風弄羽翰

同詹明誠傳茂元遊晞真館有詩因次韻

橘柚垂紅古觀秋歸途邂逅得尋幽晴沙散策隨山遠
夜月回船信水流勝處無詩端可恨他時有酒更來遊
相陪二妙平生友老矣襟期共一丘

會蔡子思張叔獻二教授

膠庠夙昔記追隨物變時移萬事非曉闕風煙征騎滿
夜窗燈火故人稀中郎秉德無瑕類平子談經有旨歸

獨我衰遲愧朋友蹉跎已覺壯心違

翁仁山受恩歸恩以詩相訪因次其韻

寒堦響葉終日靜剝啄欣聞人叩關一聽清言風灑座
幾回幽夢月沈山遺珠未許留滄海老驥縱聞在六閑
獻策明光豈無用人心久矣厭多艱

防江行

朝來殺氣秋千里無立草翩翩黑幟飛結壘天長道獵
罷楚天寒黃雲淡如掃

漢家飛將雄夜戰燕城北雙刀斫盡利月暗穿圍出低
頭拔勁箭却向敵軍射

寒烽隔水明敵意猶巨測君王自臨戎萬騎隨清蹕士
氣薄層霄挽搶夜無色

宴坐巖

青青梳樹林下蔭蒼蘚石幽人宴坐時懷抱忘所適不
見暮樵歸寒山雨中碧

涼陰軒

北窓何所見疎竹雜遙岑涼飈思有無虛簷動蕭森此
興何由盡移牀入翠陰

次韻六四叔村居即事

飯了呼童疊石門雨餘幽事不勝繁花殘何用深惆悵
梧竹新陰又滿園

田家

長空淡淡如雲掃暮過田家風物好耕犂倚戶寂無人
飢牛卧齧牆根草

贈宗周賓

我車南君車北相逢總是天涯客
擁爐談笑一燈殘出門風雨千山隔

景陽鐘二首

景陽鐘動曉寒清度柳穿花隱隱聲
三十六宮梳洗罷却吹殘燭待天明

一刀殘月淡觚稜遙望林梢曉色升
寂莫小簾風露冷玉盆脂水已生冰

寒澗

林間幽鳥啄枯槎落盡寒潮一澗沙
獨木橋西遊子宿
酒旗斜日兩三家

秋望

輝輝江日已沈西
隱約餘紅泛渺瀰
却上松岡望秋色
偶逢僧話立多時

得沖佑命

幾年歸夢水雲間
猿鶴重尋已厚顏
慚愧君恩猶竊祿

官衙偏帶武夷山

悠然堂和致明絕句

清霜一夜倒蒹葭
放出湖光徹遠沙
漠漠浮煙收欲盡
晚風輕浪蹴銀花

燕子

燕子營巢得所依
銜泥辛苦傍人飛
秋風一夜驚桐葉
不戀雕梁萬里歸

絕句

目送孤鴻獨倚樓晚風吹淚更橫流
蕉花落處蠻烟碧
六十三程是白州

汴京紀事

聯翩漕舸入神州梁主經營授宋休
一自北人來飲馬
春波惟見斷水流

篤耨清香步障遮並桃冠子玉簪斜
一時風物堪魂斷
機女猶挑韻字紗

萬炬銀花錦繡圍景龍門外軟紅飛
淒涼但有雲頭月

曾照當時步輦歸

盤石曾聞受國封承恩不與倖臣同時危
運作高城砲猶解捐軀立戰功

梁園歌舞足風流美酒如刀解斷愁
憶得少年多樂事夜深燈火上樊樓

輦轂繁華事可傷師師垂老過湖湘
縷衣檀板無顏色一曲當時動帝王

得天台命

暖風環佩滿芳洲，貝闕珠宮憶舊遊。
此日劉郎心似水，桃花空遶暮溪流。

遊密菴

病身偏與靜相宜，著意悠悠定自癡。
兀坐南窗了無語，篆花縈處一星移。

絕句送巨山

二年寄跡閩山寺，一笑翻然向浙江。
明月不知君已去，夜深還照讀書窗。

有懷

滿空寒雨雜飛煙湖上先生擁褐眠
借問茆齋容客否

夜燈相伴讀韋編

胡原仲

結茆同隱水雲間何日柴車不往還
憶得松林長嘯罷

歸時明月徧秋山

劉溫其

風驚枯葦白花浮欲下橫橋晚更留
惆悵不逢吳季子

一溪寒水帶煙流

吳公路

曾訪高上翠峯至今清興逐松風
籃輿夢想行山處

白葛花開細雨中

密庵

約致明入開善不至

偶臨沙岬立多時
淡淡煙村日向低
幽事挽人歸不得
一枝梅影侵澄溪

夜涼

聃舍蕭蕭暑雨餘
夜涼清若在冰壺
一窗月上杉篁影
便是人間水墨圖

次韻朱喬年送山老住三峰

平生耳裏三峰寺
況識峰頭舊主人
借我一筇扶病去
月林松吹度綸巾

寄題黃應亨東明齋

青藜不復來人世
好學如君自少雙
賴有羲和鞭日轂
晚紅常照讀書窗

齋居雅意與誰論
會見依光沐寵恩
慚愧野人欺我嬾
相招炙背坐松根

送致明之高沙

忽驚風袂去翻翻老子吟毫強更援底事幽懷却成惡
驚峯一點入離樽

附跋家藏劉病翁遺帖

病翁先生壯歲棄官端居味道一室蕭然無異禪衲視
世之聲色權利人所競逐者漠然若亡見也熹蚤以童
子獲侍左右先生始亦但以舉子見期而熹竊窺觀見
其自為與所以教人者若不相似暇日僭有請焉先生
欣然嘉其有志始為開示為學門戶朝夕誨誘疊疊不

倦其後先生屬疾熹適行役在外亟歸省問先生喜甚
顧而語曰病中無可與語幸吾子之來歸也自是日奉
湯藥先生所以教詔益詳期許益重至為俱道平生問
學次第傾倒無餘一日從容因出詩一篇見授先生性
不喜書常時詩文率多口占使諸生執筆獨此與贈劉
致明丈長句皆手書之其意可見也既入發故篋得碎
紙數十皆平日省躬自厲之言稍以先後次為一篇命
熹與同舍生黃銖筆之復取閱視手自更定數十字間

不一日遂啓手足諸子妹乃共發其先所緘封遺書數
副皆熹未歸時所留處畫庶事徧及遺孤復有片紙屬
熹為作張公書末有勉力大業之語熹始得位受而寶
藏之以至于今不敢失墜然而躬行不力老大無成不
能有以仰副當日付授之意抱此愧恨每念將無以見
先生于地下今病已力何所復云始取遺墨聯為一編
而序其本末以示子孫且以示諸同志使于前脩景行
之懿知所跋慕而又視熹之惻愴無聞以為前車之戒

也熹字元晦亦先生所命其祝詞具在以非臨終手筆
別附他卷先生沒以紹興十七年丁卯後五十二年慶
元己未五月丙申門人朱熹謹書

石倉歷代詩選卷一百八十一

欽定四庫全書

石倉歷代詩選卷一百八十二

明 曹學佺 編

宋詩五十九

朱熹

遠遊篇

舉坐且停酒聽我歌
遠遊遠遊何所至
咫尺視九州九州
何茫茫環海以為壘
上有孤鳳翔下有神駒驤孰能

不憚遠為我遊其方為子奉尊酒擊鉢歌慨慷送子臨
大路寒日為無光悲風來遠壑執手空徊徨問子何所
之行矣戒關梁世路百艱難出門始憂傷東征憂暘谷
西遊畏羊腸南轅犯癘毒北駕風裂裳願子馳堅車躡
險摧其剛戕戕既不支瑣瑣誰能當朝登南極道暮宿
臨太行睥睨即萬里超忽凌八荒無為蹙蹙者終日守
空堂

擬古

離離原上樹戢戢澗中蒲娟娟東家子鬱鬱方幽居濯
濯明月姿靡靡朝華敷昔為春蘭芳今為秋薜蘿寸心
未銷歇託體思同車

其二

綺閣百餘尺朝霞冠其端飛欄麗遠漢曲楹何盤桓清
謠發徽音一唱再三歎借問誰為此佳人本邯鄲微響
激流風浮雲慘將寒為言何所悲遊子在河關不恨久
離濶但憂芳歲闌願為清宵夢燕昵窮餘歡

其三

上山採薇蕨側徑多幽蘭采之不盈握欲寄道里艱沈
憂念故人長夜何漫漫芳聲坐銷歇徘徊以悲歎

其四

佳月朗秋夜蟋蟀鳴空堂大火西北流河漢未渠央野
草不復滋白露結為霜梁燕起高飛雲雁亦南翔念我
同心子音形阻一方不念執手歡隔我如參商寓龍不
為澤畫餅難克腸金石徒自堅虛名真可傷

其五

高樓一何高俯瞰窮山河秋風一夕至憔悴已復多寒
暑遞推遷歲月如頽波離騷感遲暮惜誓閔蹉跎放意
極驩虞咄此可奈何邯鄲多名姬素艷凌朝華妖歌掩
齊右緩舞傾陽阿徘徊起梁塵綵綵紛衣羅麗服乘奇
芬顧我長咨嗟願生喬木陰黃緣若絲羅

其六

夫君滄海至贈我一篋珠誰言君行近南北萬里餘結

作同心花綴在紅羅襦雙垂合歡帶麗服眷微軀為君
一起舞君情定何如

其七

衆星何歷歷嚴宵麗中天殷憂在之子起步荒庭前出
門今幾時書札何由宣沈吟不能釋愁結當誰憐臨風
一長歎淚落如奔泉

邵武道中

風色戒寒候歲事已逶遲勞生尚行役遊子能不悲林

壑無餘秀野草不復滋禾黍經秋成收歛已空畦田翁
喜歲豐婦子亦嘻嘻而我獨何成悠悠長路歧凌霧即
曉裝落日命晚炊不惜容鬢凋鎮日長空飢征鴻在雲
天浮萍在青池微蹤政如此三歎復何為

友人黃子衡欲之上庠以詩留行

若士有奇操久壓山林卑奮衣千里道已與親友辭子
行何悠悠世路方如茲歸來亦何日車馬光陸離幽蘭
生前林擢置白玉墀不以芳意遠結根終不移願子崇

明德潛躍貴因時悲風靜夜聽喬木歲寒姿何以迴軒
駕千載相與期

奉酬丘子野表兄飲酒之句

微褐不克體寒夜懷重衾古來窮廬士歲暮多苦心苦
心亦何為世路多崎嶇不藉杯中物離愁坐自侵舉杯
當勿辭何為復沈吟醺酣遺所拘神慮契遐襟荒涵思
前戒歡謠發清音雅唱一何高仰酬非所任申章聊叙
報洪量亦余欽

古意

兔絲附樸櫟桂樹生高岡弱蔓失所依佳木徒蒼蒼兩
美不同根高下永相望相望無窮期相思諒徒為同車
在夢想忽覺淚沾衣不恨歲月邁但惜芳華姿嚴霜委
百草坐恐及茲時盛年無再至已矣不復疑

晨起對雨

淒冽歲云晏雨雪集晨朝高眠適方起四望但蕭條遠
氛白漫漫風至林靄消流潦冒荒塗清川亦迢迢遐瞻

思莫窮端居心自超覽物思無託即事且逍遙

春日言懷

春至草木變郊園猶掩扉茲晨與心會覽物徧芳菲
桃李破淺紅時禽悅朝暉泉谷暖方融原田水初肥
東作興庶忙歲功始在茲端居適自慰世事復有期
終然心所向農畝當還歸

晚步

初日麗高閣廣步愛脩廊重門掩秋氣高柳蔭方塘
閑

海冬尚溫晏陰天未霜坐悲景物殊亦念歲時荒故園
屬佳辰登覽徧陵岡賓遊盡才彥瀟散屏壺觴別來時
已失懷思寧暫忘宦遊何所誤要使心懷傷

卜居

卜居屏山下俯仰三十秋終然村墟近未愜心期幽近
聞西山西深谷開平疇茆茨十數家清川可行舟風俗
頗淳朴曠土非難求誓捐三徑資往遂一壑謀伐木南
山巔結廬北山頭耕田東溪畔濯足西溪流朋來即共

歡客去成孤遊靜有山水樂而無身世憂著書俟來哲
補過希前脩茲焉畢暮景何必營菟裘

賦水仙花

隆冬凋百卉江梅厲孤芳如何蓬艾底亦有春風香紛
敷翠羽帔溫艷白玉相黃冠表獨立淡然水仙粧弱植
愧蘭蓀高操摧水霜湘君謝遺標漢水羞捐當嗟彼世
俗人欲火焚衷腸徒知慕佳冶詎識懷貞剛淒涼栢舟
誓惻愴終風章卓然有遺烈千載不可忘

秘閣張丈簡寂之篇韻高難繼別賦五字以謝
來貺

勞農會稽宅息駕丹元鄉丹元不可見翠壁空雲房是
時中春月暄風發新陽白水注幽壑綠樹敷崇岡俯聽
足怡悅仰觀共徜徉班坐得瑤草傾壺得瓊漿長吟遊
仙詩亂以招隱章忽忽林景西躊躇深慨慷坐上江湖
客兀傲鬚蒼蒼逸氣邁霄漢英詞吐琳琅思與泉石勝
韻隨笙鶴翔追遊不敢及咏歎可能忘

卧龍菴武侯祠

空山龍卧處蒼壁神所鑿下有寒潭幽上有明河落我
來愛佳名小築寄幽壑永念千載人丹心豈今昨英姿
儼繪事凜若九原作寒藻薦芳馨飛泉奉明酌公來識
此意顧步憐不樂抱膝一長吟神交付冥漠

開先漱玉亭

奇哉康山陽雙劍屹對起上有橫雲飛下有瀑布水崩
騰復璀璨佳麗更雄偉勢從三梁外影落明湖裏平生

兩仙句咏歎深仰止三年落星灣悵望眼空眯今朝隨杖屨得此弄清泚更誦玉虹篇塵襟諒昭洗

簡寂觀行

高士昔遺世築室蒼崖陰朝真石壇峻煉藥古井深結交五柳翁屢賞無絃琴相携白蓮渚一笑傾夙心晚歲更市朝故山鎮峰岑柴車竟不返鸞鶴空遺心我來千載餘舊事不可尋四顧但絕壁苦竹寒蕭椽

康王谷水簾

循山西北驚崎嶇幾經丘前行荒蹊斷谿見清溪清一
涉臺殿古再涉川原幽縈紆復屢渡乃得寒巖陬飛泉
天上來一落散不收披崖日唯嶮噴壑風颼颼追薪爨
絕品淪茗澆窮愁敬酬古陸子何年復來遊

秋懷

秋風吹庭戶客子懷故鄉矧此卧愁疾徘徊守空房佇
想澗谷居林深憐悲涼鷓鴣感蕭辰拊翼號風霜氛雜
無留氣悄悄有餘芳幸聞衛生惡招隱夙所藏終期謝

世慮矯翮茲山岡

其二

懷疴坐竟日晚色散幽樹寂歷候蟲悲沆瀣碧草露端
居興方淡沈默自成趣羽觴歡獨持瑤琴誰與晤空知
玄思清未惜年華度美人殊不來歲月空遲暮

遊密菴

閩鄉饒奇山仙洲故稱傑巍然一峰高復與衆山絕傳
聞極目處天水遠明滅萬里倏往還三光下羅列我來

發孤興徑欲躋嵒嶽病骨竟支離何當振去轍

歸自湖南袁州道中多奇峰秀木怪石清泉

我行宜春野四顧多奇山攢巒不可數峭絕誰能攀上有青葱木下有清泠灣更憐灣頭石一一神所剡衆目共遺棄千秋保堅頑我獨抱孤賞喟然起長歎

賦歸雲洞

人生信多患吾道初不窮云何感慨士伏死堪巖中宜陽古道周竅石何嵌空窮幽歷肺腑履坦開房櫳頗疑

有畸人往昔寄此宮歲月詎云幾井竈無遺蹤我來記
清秋歸途渺窮冬興懷重幽討永嘯回長風風回雲氣
歸洞口春濛濛信美非人境出門吾欲東

過潤陂日晴意可喜至暮復雨因次伯宗韻

客裏歲云暮我心殊未平悠悠惜往日鬱鬱懷平生况
復久陰雨喜茲霜曉明那知不終日又作瀟瀟聲坐厭
泥塗辱空嗟鴻雁輕

宿黃沙以山如翠浪湧分韻得如字

日中秣吾馬日暮膏吾車崎嶇陟南嶺浩蕩凌八區夜
雨薦峰前朝登碧琳墟蒼茫永歎罷翕忽清景徂去此
二三子我行將何如崔嵬正丘垤萬里思南圖

暇日侍法曹叔父陪諸名勝為落星之遊

長江西委輪匯澤東滉漾中川屹孤嶼佛屋寄幽賞我
來此何日秋風欲蕭爽共載得高儔良辰豈孤往酒酣
清歎發浪湧初月上疊鼓喚歸艍陳迹貢俯仰

釋奠齋居

理事未逾月簿書終日親簡編不及顧几閣積埃塵今
辰屬齋居煩跼一舒伸瞻眺庭宇肅仰首但秋旻茂樹
禽轉幽忽如西澗濱聊參物外趣豈與俗子羣

秋懷

井梧已飄黃澗樹猶含碧煙水但逶迤空齋坐蕭瑟端
居生遠興散漫委書帙愛此北窓閒時來岬輕幘微鐘
忽迢遞禽語破幽寂魂神為悄然淡泊忘所適

寄題金元鼎同年長泰面山亭

抗心塵境外結宇臨秋山乘高一騁望表裏窮遐觀衆
嶠互攢列連岡莽縈環陽崖煙景舒陰壑悲風寒碧草
晚未凋林薄已復丹仙人吳門子歲晚當來還

冬至陰雨

愆陽值歲晏忽復層陰結一雨散霏微千林共騷屑端
居遺簿領遠意懷幽潔曠慮守微疴殊方感新節豈伊
田廬念丘壠心摧折還登東嶺岡瞻垺何由歇

還家即事

獻歲事行役徂春始還歸昔往草未芳今來翠成幃扶
疎滿園陰時禽互翻飛叢萱亦已秀丹葩耀晨輝即事
誰與娛淹留自忘機日暮復出門悵然心事違古人不
可見獨掩荒園扉

和林懌之黃雲之句兼簡同遊諸兄

登覽日云晏歸車耿重岡天風振余旂夕露沾我裳數
子情未厭春山杳茫茫還瞻長江白迴眺飛雲黃當念
塵中友心期邈相望無為跨鴻鵠決起凌青蒼

三月晦日與諸兄為真率之約裴回石馬晚集

保福偶成

春服明朝換晴川漲綠陰
追隨皆勝侶邂逅即初心
社蹟莓苔古禪扉竹樹深
移尊真惜日畢景共披襟
儉德遵賢範哇詞愧雅音
清和應更好逸想寄雲岑

宿石岵館

春江日東注我行邈其波
揚帆指西澨兩岵青山多
青山自逶迤飛石空蹉峨
綠樹生其間幽鳥鳴相和
寥蓬

騁遐眺擊楫成幽歌獨語無人晤茲懷竟何如

過武夷山

弄舟綠碧澗棲集靈峰阿夏木紛已成流泉注驚波雲
開啓茫茫高城鬱嵯峨眷言羽衣子俛仰日婆娑不學
飛仙術纍纍丘塚多

宿武夷觀妙堂

陰靄除已盡山深夜還冷獨卧一齋空不眠思耿耿閒
來生道心妄遣慕真境稽首仰高靈塵緣誓當屏

久雨齋居誦經

端居獨無事聊披釋氏書
暫息塵累牽超然與道俱
門掩竹林幽禽鳴山雨餘
了此無為法身心同晏如

雨中示魏惇夫兼懷黃子厚

讀書春日晏雨至滿郊園
一灑幽叢竹藹藹清陰繁
齋居無還往鎮日空掩門
欲將冲靜趣與子俱忘言

晨登雲際閣

晨起踏僧閣徙倚望平郊
攢巒夏雲曉蒼茫林影交
暫

釋川途念憇此煙雲巢聊欲託僧宇歲晏結蓬茆

倒水坑作

窮幽鮮外慕殖志在丘園即此竟無得空恨歲時遷川
陸綿半載煩煥當歸緣憇此蒼山曲洗心聞澗泉

齋居聞磬

幽林滴露稀華月流空爽獨士守寒棲高齋絕羣想此
時隣磬發聲合前山響起對玉書文誰知道機長

川上見月歸示同行者

川上偶攜手皓月起林端一舒臨流望玄露已先溥歸
掩荒園扉更怯衣裳單清夜誰晤言獨處誰為歡

同安官舍夜作

官署夜方寂幽林生月初閒居秋意遠花香寒露濡故
國異時節欲歸懷簡書聊從西軒卧塵思一蕭疎

留安溪三日按事未竟

懸郭四依山清流下如駛居民煙火少市列無行次嵐
陰常至午陽景猶氛翳向夕悲風多遊子不遑寐

試院即事

端居惜春晚庭樹綠已深重門掩晝靜高館正陰沈披
衣步前除悟物懷貞心澹泊方自適好鳥鳴高林

謝人送蘭

幽獨塵事屏婉婉秋蘭滋芳馨不自媼掩仰空相思晤
對日方永披叢露未晞脩然發孤詠九畹陳悲詩

秋蘭已悴以其根歸學古

秋至百草晦寂莫寒露滋蘭卑一以悴蕪穢不能治端

居念離索無以遺所思願言託孤根歲晏以為期

秋暑

晨興納新涼亭午倦猶暑卧對北窓扉淡泊將誰侶疎
樹含輕颺時禽囀幽語端居悟物情即事聊容與

夜坐有感

秋堂天氣清坐久寒露滴幽獨不自憐茲心竟誰識讀
書久已懶理郡更無術獨有憂世心寒燈共蕭瑟

溪亭

循澗闢芳園結亭對虛壁澄潭俯幽鑒空翠仰寒滴主
人心事遠妙寄塵壤隔豈為功名期而忘此泉石

雪亭

危亭竹栢間悄舊日幽絕朔風一以厲愛此枝上雪仰
悲玄景駛俯歎羣芳歇不用此時來那知歲寒節

殘臘

殘臘生春序愁霖逼歲昏小紅敷艷萼衆綠被陳根陰
壑泉方注原田水欲渾農家向東作百事集柴門

喜晴

衝飈動高柳綠水淡微波日照秋空淨雨餘寒草多放
懷遺簿領發興託煙蘿忽念故園日東阡時一過

書事

重門掩晝靜寂無人境喧嚴程事云已端居秋向殘超
搖捐外慮幽默與誰言即此自為樂何用脫籠樊

秋夕

秋風桂花發夕露寒螢吟歲月坐悠遠江湖亦阻深紛

思寧復整離憂信難任終遺誰為侶獨此淡冲襟

南安道中

曉澗淙流急秋山寒氣深高蟬多遠韻茂樹有餘陰
煙火居民少荒蹊草露侵悠悠秋稼晚寥落歲寒心

晚望

禾黍彌平野淒涼故國秋清露凝碧樹落日翳層丘
覽物知時變為農覺歲邁不堪從吏役憔悴欲歸休

安溪書事

清溪流不極夕霧起嵐陰虛邑帶寒水悲風號遠林涵
山日欲晦窺閣景方沈極目無遺眺空令愁寸心

柚花

春融百卉茂素縈敷綠枝淑郁麗芳遠悠颺風日遲南
國富嘉樹騷人留恨詞空齋對日夕愁絕鬢成絲

對月思故山夜景

沈沈新秋夜涼月滿荆扉露泣凝餘彩川明澄素暉中
林竹樹映疎星河漢稀此夕情無限故園何日歸

小集梵天寺坐間雨作已復開霽步至東橋玩月
傑閣翔林杪披襟此日間層雲生薄晚涼雨徧空山地
迫衣裳冷天高澄霽還出門迷所適月色滿林關

梵天觀雨

持身乏古節寸祿久棲遲
整寄靈山寺空吟招隱詩
讀書清磬外看雨暮鐘時
漸喜涼秋近滄洲去有期

登閣

橫空敞新閣高處絕炎氛
野迥長風入天秋涼氣分
憑

欄生逸想投迹遠人羣終憶茆簷外空山多白雲

呈黃子厚

茆齋塵事遠幽獨興無窮永晝呻吟內新涼愁思中朱
顏非昨日素髮已秋風珍重牆東客遙憐此意同

蒙判院丈垂示用韻喜晴之句率爾奉酬

客枕終難穩歸來野息深曉雞回遠夢缺月挂空林水
谷晨加帽晴窗晝解襟詩筒多妙語仍喜舊盟尋

登定王臺

寂寞番君後光華帝子來千年餘故國萬事只空臺日
月東西見湖山表裏開從知與鳩樂勿作雍門哀

後洞山口晚賦

日落千林外煙飛紫翠深寒泉添壑底積雪尚崖陰景
要吾人共詩留永夜吟從教廣長舌莫盡此時心

贈上封諸老

夜宿上封寺脩然塵慮清月明殘雪裏泉溜隔窗聲楮
衲今如許綈袍那復情爐紅虛室煖聊得話平生

十五日再登祝融用臺字韻

江流圍玉界天影抱瓊臺拄杖煙霄外中巖日月回箕
山藏遁許吳市隱仙梅一笑今何在相期再舉杯

舟中晚賦

長風一萬里披豁暮雲空極浦三年夢扁舟二子同離
離浮遠樹杳杳沒孤鴻若問明朝事西山掩靄中

安仁曉行

夙駕安仁道行行得自娛荒山圍野濶遠樹出林孤景

晦長煙合天寒碧草枯歸心懷往路極目尚平蕪

宿休菴用德功壁間韵贈陳道人

暮入千峰裏寒棲一草菴室連丹竈煖厨引石泉甘塵
慮紛難到神光耿內含非君有道氣孤絕詎能堪

寄雲谷瑞泉菴主

憶昔誅茆日山房我自名風埃猶俗累煙雨負巖耕多
謝空門侶能同物外情肯來分半壑聊爾度平生少待
清秋日間尋遠嶽盟不知誰是客一笑絕塵纓

和李伯玉用東坡韻賦梅花

北風日日霾江村歸夢正爾勞營魂忽聞梅蕊臘前破
楚客不愛佩蘭香尋幽舊識此堂古曳杖偶集僧家園
嵐陰春服未全到邂逅只有南枝溫冷光自照眼色界
雲艷未怯扶桑暎遙知雲臺溪上路玉樹十里藏山門
自憐塵羈不得去坐想佳處知難言但哦君詩慰岑寂
已似共倒花前樽

題霜傑集

先生人物魏晉間題詩便欲傾天慳向來無地識翁宇
今日天遣窺波瀾平生尚友陶彭澤未肯輕為折腰客
胸中合處不作難霜下風姿自奇特小儒閥閱金匱書
不滯周南滯海隅枌榆連陰一見晚何當挽袖凌空虛

秋夜歎

秋風淅瀝鳴清商秋草未死啼寒螿幽人夜半起晤歎
仰視河漢天中央河漢西流去不息人生辛苦何終極
蒼山萬疊雲氣深去鍊形魂生羽翼

夢山故人

風雨蕭蕭已送愁不堪懷抱更離憂故人只在千巖裏
桂樹無端一夜秋把袖追歡勞夢寐舉杯相屬暫綢繆
覺來却是天涯客簷溜潺潺瀉未休

次韵傅丈題呂少衛教授藏書閣

西樓誰與共閒居茂樹婆娑清晝餘大隱祇今同一壑
行吟非昔似三閭揣摩心事惟黃卷料理家傳亦素書
更鑿寒泉供漱石世紛寧擬問焉如

和抱一劉君

幾年牢落舊村墟
此日脩然水竹居
病起試尋春徑草
客來聊煮雪畦蔬
開樽細說平生事
信手同繙集古書
適意何勞一千卷
新詩閒出笑談餘

數日前與判院丈有宋村之約
雪中有懷奉呈判院通判二丈

雲垂天濶歲將闌
一室脩然獨掩關
擁褐不知風折木
開軒惟見雪漫山
玄空杳靄低迷外
碧樹瑤瓏掩映閒

吟罷左思招隱句扁舟無路過長灣

陪彥集克父同遊瑞巖次莆田使君留題之韻

踏破千林黃葉堆林間臺殿鬱崔嵬谷泉噴薄秋逾響
山翠空濛畫不開一壑祇今藏勝槩三生疇昔記曾來
解衣正作留連計未許山靈便却回

積芳圃

樂事從茲不易涯朱門還似野人家行看靚艷須携酒
坐對清陰但煮茶曉起蒼涼承墜露晚來光景亂蒸霞

平生結習今餘幾試數毗那櫟上花

舫齋

扁舟容與小房櫳搖颺簾旌蜀錦紅兩岼蒹葭秋色裏
一川煙浪夕陽中不愁灩澦雙蓬鬢未怯江湖萬里風
築室水中聊爾爾何須極浦望朱宮

秋香徑

門外黃塵沒九達坊中叢桂長樛枝三秋冷蘂從開落
終歲清陰不移移幽徑祗愁空翠滴濃香一任晚風吹

攀援却恨王孫遠惆悵千林欲暮時

曲池軒

去年種竹長新篁今歲穿渠過野塘
自喜軒窗無俗韻從知草木有真香
林間急雨生秋思水面微風度晚涼
却厭端居苦無事凭欄閒理釣絲長

次秀野詠雪韻

閉門高卧客來稀起看天花滿院飛
地迥杉篁增勝槩庭虛鳥雀噪空飢
酒腸凍澀成新恨病骨侵凌減舊肥

賴有袁生清興在，忍寒應未泣牛衣。

題翠壁

孤亭一日盡天涯，俯瞰煙村八九家。
翠壁何年懸布水，綠陰經雨墮危花。
杖藜徙倚凝春望，覓句淹留到晚衙。
珍重詩翁莫相惱，枯腸攪斷鬢絲華。

次秀野泛滄浪館至赤石觀刈早稻韻

綠雲黃半武夷鄉，碧水縈紆一帶長。
聞道放船飛皂蓋，定知行酒載紅裳。
權謳如賀豐年信，樂飲閒酬此日涼。

未忝誰言不陽艷晚炊流詠有餘香

次秀野韻題卧雲菴

君家丘壑本圓成何意尋芳入翠屏為愛晴雲薦孤枕
故將閒日付新亭夢魂寂寂衣裳冷心事悠悠簡策青
更把枯桐寫竒趣鷗絃寒夜獨泠泠

次韻雪後書事

惆悵江村幾樹梅杖藜行遠去還來前時雪壓無尋處
昨夜月明依舊開折寄遙憐人似玉相思應恨劫成灰

沈吟日落寒鴉起却望柴荆獨自回

葺居

丈人高卧碧江頭門掩西風萬木秋
重喜青山還遶屋却嫌黃葉漸平溝
開軒且放浮嵐入決水徐通廢圃流
便覺園林頓蕭爽不妨隨境味玄幽

假山焚香作烟雲掬水為瀑布

平地俄驚紫翠堆便應題作小飛來
爐熏細度巖姿出溜澀遙分壁竇開
獨往但憑南郭几遠遊休剪北山萊

人言造化無私力珍重仙翁挽得回

圭父為彥集置酒白蓮沼上彥集有詩因次
其韻呈坐上諸友

大阮歸來客滿堂更移芳席近回塘共憐的皪水花淨
并倚披離風益涼銀筆看題青玉案佳人恨望碧雲鄉
此時此景真愁絕病著無因為舉觴

送四十叔父

吾家從昔號青門叔父于今道更尊客路艱難空自惜

遺經終始向誰論獨尋雲嶠逢孤雁共愛春江接故園
細說刈葵休放手此來真不為盤餐

和張彥輔雪後樓賢之作

夜來春雪徧林丘却喜風威曉便收好上藍輿閒縱目
休將衲被苦蒙頭微官正愧逍遙社勝日猶堪汗漫遊
欲出林關戀瑤草不妨樽酒更淹留

送建陽陳丞伯厚還鄉

括蒼雲壑入秋夢閩嶺風霜侵鬢絲歲晚未收稽古力

徑荒曾擬賦歸辭一官坎壈嗟丞負百歲歡榮慶母慈
去步逶迤無愠色此心惟有古人知

已未九日子服老弟及仲宣諸友載酒見過坐
間居厚廟令弟出示佳句次韻為謝并呈諸同社
籬菊斑斑半吐黃沂中又報紫萸香裝成令節秋還晚
揀得高情老更狂載酒極知乖勝踐沾衣却免歎斜陽
餘年只恐逢辰少吟罷君詩引興長

叔通老友探梅得句不鄙垂示且有領客攜壺

之約次韵為謝

迎霜破雪是寒梅何事今年獨晚開
應為花神無意管故煩我輩著詩催
繁英未怕隨清角疎影誰憐蘸綠杯
珍重南鄰諸酒伴肯尋江路覓香來

芭蕉

芭蕉植秋檻勿云憔悴姿與君障夏日羽扇寧復持

蔬圃

花柳遠宅茂先生在郊居下帷良已苦時作帶經鋤

題石佛院亂峰軒

因依古佛居結屋寒林杪當戶碧峰稠雲煙自昏曉

題畫卷

流雲遶空山絕壁上蒼翠應有采芝人相期煙雨外

石瀨

疏此竹下渠漱彼澗中石暮館繞寒聲秋空動澄碧

月榭

月色三秋白湖光四面平與君凌倒景上下極空明

采菱舟

湖平湖水碧桂棹木蘭舟一曲菱歌晚驚飛欲下鷗

劉平甫席上分得寫字

歲晚風雨交流雲暗平野公子燕華姻招呼及同社高
情寄壺餐晤言到風雅剪燭夜堂深幽懷共書寫

江月圖

江空秋月明夜久寒露滴扁舟何處歸吟嘯永佳夕

題米元暉畫

楚山直叢叢木落秋雲起向曉一登臺滄江日千里

題二妃圖

瀟湘木落時玉珮秋風起日暮欲何之寂寞寒江水

石門塢

朝開雲氣擁暮掩薜蘿深自笑晨門者那知孔氏心

祝孝友作枕屏小景以霜餘茂樹名之因題此詩

山寒夕飈急木落洞庭波幾疊雲屏好一生秋夢多

夜聞子規

幽林欲雨氣含淒
春晚端居園徑迷
獨向高齋展衾卧
南山夜夜子規啼

寄諸同寮

把酒江頭煙雨時
遙知江樹已芳菲
應憐倦客荒茆裏
落盡梅花未得歸

之德化宿剝頭鋪夜聞杜宇

王事賢勞祇自嗤
一官今是五年期
如何獨宿荒山夜
更擁寒衾聽子規

小盈道中

今朝行役是登臨極目郊原快賞心却悔從前嫌俗事
一春牢落閉門深

示西林可師

身世年來欲兩忘一春隨意住僧房行逢舊隱低回久
綠樹鶯啼清晝長

入端巖道間得四絕句呈彥集亢父二兄

憶昔南遊桂樹陰歸來遺恨滿塵襟籃輿此日無窮思

萬壑千巖秋氣深

翩翩一馬兩肩輿路轉秋原十里餘
共說前山深更好
不辭迢遞款禪居

清溪流過碧山頭空水澄鮮一色秋
隔斷紅塵三十里
白雲黃葉兩悠悠

風高木落晚秋時日暮千林黃葉稀
祇有蒼蒼谷中樹
歲寒心事不相違

竹節灘

船下清江竹節灘長煙漠漠水漫漫人家斷岬斜陽好
客子中流薄暮寒

野望

登高立馬瞰晴川四面平林接暝煙東望不堪頻極目
歸心已度鳥飛前

山茶

江南池館厭深紅零落荒煙細雨中却是北人知愛惜
數枝和雪上屏風

和喜雨

黃昏一雨到天明
夢裏豐年有頌聲
起望平疇煙草綠
只今投筆事農耕

武陵樵歌

一曲溪邊上釣船
幔亭峰影蘸晴川
虹橋一斷無消息
萬壑千巖鎖翠煙

六曲蒼屏遶碧灣
茱萸終日掩柴關
客來倚棹巖花落
猿鳥不驚春意閒

夜

獨宿山房夜氣清一窗涼月共虛明鄰雞未作人聲悄
時聽高梧滴露鳴


謝吳公濟菖蒲

翠羽紛披一尺長帶煙和雨過書堂知君別有臞仙種
容易難教出洞房

秋日

一雨生涼杜若洲月波微漾綠溪流茆簷歸去無塵土

淡薄閒花遶舍秋



石倉歷代詩選卷一百八十二

欽定四庫全書

集部

石倉歷代詩選卷一百八十三至
九十一

詳校官庶吉士臣范逢恩

侍讀臣孫球覆勘

總校官進士臣朱 鈐

校對官中書臣葉 蘭

謄錄監生臣馮 薰

欽定四庫全書

石倉歷代詩選卷一百八十三

明 曹學佺 編

宋詩六十

陳淵

延平江上呈吳國華先生

青山如偉人可望不可致屹然瞰洪流龍翔并虎視春風何時來草木舞深翠禽鳥暖相依飛鳴得真意願言

斬茆茨結室傍蒼蔚且要觀此身功業亦細事

次韻欲遊西湖阻雨

去年賞西湖薄暑攀躋難同遊幸勝士酒沃衣巾斑今
歲來錢塘臘雨扁舟寒友朋適四集局蹙樊籠間此生
分林泉造物猶余慳未為登岳禱且作訪戴還無私本
天理敢怨陰雲頑向來旱蝗惡征賦亦未寬寧令風作
雪要看麥堆山

十五日過許夜雨暴作明日行四十里宿于潁

橋又明日晴書

狂風撼平野沙礫迷兩目
筇輿我與君道遠疲徵逐
驚雷一夜發暴雨溢川谷
平明泥沒趾寸步不容續
我生賦窮蹇觸處背天福
風雨豈不好行路非所欲
中途聊息肩村驛便可宿
我勞固其分端恐僮僕燎
爐然濕薪傍舍酒初熟
安能浣愁腸但取充飢腹
中宵耿不眠明月忽掛屋
攬衣起視夜抹馬亦膏轂
人情亦喜愠天道有翻覆
陰霽那可知去去無欲速

寄內

明月向人圓愛之不忍睡坐久風露寒忽忽心如醉念
君一適我所遇無歡意況乃久別離相思到夢寐我生
百不堪謬學屠龍技于今半世人升斗亦未遂願有室
中友素懷隱居志肯與梁伯鸞扁舟共東逝

小軒觀月呈興宗叔

茅檐手可攀脩竹出檐上寒蟾漏疎明碎影羅屏障情
知月色好達覽在虛曠東家富池臺端坐不能訪山林

足寓目細大初無相但使人心安景物自清暢霜風中
夜作曲沼金飈浪禽鳥斷飛鳴杉松起酬唱燎爐宿殘
火尚可溫新釀數杯遣沈寔萬慮一時放

登召伯斗野亭

落帆新城曲維舟古河右幽情得危亭星斗穿戶牖西
風掃殘葉庭宇不待帚娟娟雲間月亦復照杯酒明朝
又東南汗流映衰柳莫以此時心熾然分淨垢

晚登嚴陵釣臺和安止所留詩

溪山有底好適契貧士欲敢論生不候但喜夢非僕千
秋釣臺水不濯市朝足而我獨何人得寓塵埃目携筇
縱朝步初日穿林麓西風扶兩腋一舉千里鵠

越州道中雜詠

浮雲作秋陰細雨如朝霧放形山水間意適無艱步忽
遇古招提空翠森回互倚杖聽泉鳴悠然不能去

宿仙霞聖仙寺呈伯思子靜

風物吾鄉似山川地勢分稻畦翻碧浪麥壠布黃雲客

舍常爭席山僧獨獻芹
茆柴餘瀝在聊餉僕夫勤

流長亭

江折亂山圍西來素練飛嵐光環右窵潭影漾松扉欲
靜風前樹難忘草上暉但期流澤遠長與水東歸

自建寧泛江至石首

江注天圍盡舟排浪陣輕岸容疎柳色秋氣斷鴻聲風
日雖堪好雲煙易妬情鱸魚知有興好在未知名

季脩舍舟趨諸暨謁劉元成獨泛錢清江有懷

其人

人遠牛羊暮春深草樹滋野橋低映水浦岝曲縈籬風
雨江湖思乾坤杖屨疑論心竟誰是短棹欲何之

和司錄行縣道中偶風雨有感之作

吏隱深藏霧天遊更御風分携妨舉白轉眄忽堆紅北
去豺狼盡春回雨露同向來相對飲應復念鄰翁

蕭山覺苑寺雪後杜門

雪融簷溜如秋霖古寺掩關無足音詩書廢放道眼淨

鐘鼓杳隔禪房深老僧勸坐媒以火茶鼎靜聽蒼蠅吟
胸中激梗造澄徹一念不作千憂沈浮生半日未易得
邂逅勝境聊安心明日片帆落何許歲晚濁醪誰共斟

次韻鄧志宏送張思遊福唐

紛紛浣耳俱宜洗坐遣高人厭丘里迅流蚤自促行舟
更有西風滿江葦當年筆陣掃千人今日流輩推能文
英辭豁辯灑醉墨倏忽百變春空雲人間萬事秋毫細
軒冕儻來誰著意身隨去棹落波間興逐冥鴻渺天際

三山便到蓬萊宮卸帆海嶼窺魚龍夜涼橫笛弄明月
萬頃瑠璃秋色中

錢清過堰

小風吹樹寒流止始覺西湖潮正起須臾倒卷縠紋來
已沒岸痕猶未已江流自下河自高逆上更堪行罔水
九牛回首竹索細十丈沙泥拒舟底

汝州道中呈遵道

青煙漠漠柳依依落日雲中雁北飛咄咄書空誰獨坐

遲遲行道子獨歸桑陰蓋地牛羊卧麥秀漫山鳥雀肥
向晚未知投宿處敗籬疎屋火煙微

承遵道和又用前韻書懷

端的荊州得所依羽翰終欲更南飛閩山萬里長牽夢
蜀鳥千言只喚歸當日朋儕俱草澤而今兒女自輕肥
白雲南望三年客長是尊前誦式微

再和李伯紀舍人韻

時來將相寧有種衛青故是民家奴懸鵲未用歎歲惡

潤網近喜除官通本無得喪任失馬但有言說皆陳葛
從君一飲百壺盡醉倒不知誰謂吾

次韻子靜

淵明束帶向督郵已覺歸思不可留紛紛朱墨何時休
豈待置錐無一丘平生涉世如虛舟明月從人驚暗投
胷次已無涇渭流不應罪我緣春秋

次韻陸時可歲暮感懷

小橋橫截一溪雲隔岸遙通避世人釣艇偶隨秋雁泊

吟窗今見臘梅新
煙塵已覺千山靜
雨露行看萬國春
詩酒暮年生處樂
一瓢歸去豈辭貧

離紫溪驛

小風吹面雨廉纖
輕薄衣裳懶更添
一線離情裁不斷
暮雲將過粵山尖

鉛山

欲留無計去還悲
漸遠閩山物象非
家在天南今北首
恐看歸鳥背人飛

信州禪月院晚眺

一覺華胥日又曛
晚來愁緒亂紛紛
角聲對起重城近
吹動靈山萬疊雲

登睦州環峯

月照空山杜宇啼
喚歸漁艇夜天低
那堪又是雙溪水
獨上危樓十二梯

病減枕上二首

堦草無期日自生
獨餘貧病破元正
春風一種含生意

誰道年來也世情

塵埃子石蒙蛛網殘落霜毫暗
鮮紋未把語言為戲劇
新年不作送窮文

七夕

天上銀蟾曲似鉤人間簫鼓萬家浮
從來世事俱兒戲
不獨秦娥乞巧樓

其二

信馬隨車力不勝
聊將觴豆樂交朋
青樓乞巧憐兒女

我亦如今拙未能

同魏季修雪中閒步

纖纖月色淡黃昏
城郭千家雪照人
攜手望春同茗飲
小坊燈火自相親

思安常兄

凌虛閣下煙波濶
升俊坊前草木蒼
歸去溪南春正好
不應蕭索對松篁

月夜江行

吏隱飄然在一涯
更堪行役送年華
多情却有空江月
長伴離人夢到家

約令德郊行

簷竹搖風拂面低
麥芽穿雪綠齊齊
憑君便作遊春計
莫待花繁去路迷

通州夏雨

長風卷地驅炎暑
暴雨翻空送晚涼
只此蚊蠅俱掃跡
不須迢遞待秋霜

延平林力道閣上觀水

要看春水拍天流，更為溪山一日留。
誰遣白雲迷眼界，坐令歸思入扁舟。

泊舟延平

星河不動水東流，夜影搖空逼釣舟。
夢破滄浪歌在耳，欲尋溪友向煙洲。

自浦城放船下建安寄龐幾先

茆柴也解發清狂，仰看雲天盡十觴。
白首歲寒猶道路，

自憐無意避風霜

寄養蒙兼呈景駿

粥魚齋鼓網蛛窠古寺長廊客少過
惟有一溪明月在
夜寒偏向斷垣多

其二

太史溪頭十里間朝陽峰下水涵天
青鞋不踏紅塵陌
夢斷僧窗又一年

自梅花村回道中書壁

刺水秧針出已齊
雨餘膏澤未全犁
道傍牛喘無情問
慚愧林間布穀啼

邑中諸公見和再用前韻

看盡愁人萬點紅
曉來雙鬢白于茸
他時儻記江南夢
畫我黃梅細雨中

山寺梅花

雲間初日慘無光
天外歸鴻豈戀行
短景去人如掣電
不應留滯野梅香

其二

雲母燒香不見煙
夜深齋閣閉龍涎
此生暇日真難得
蕭寺重來已四年

次韻李光祖南山偈

窗前松竹翠連山
窗下弦歌晝掩關
雪裏忍看梅欲吐
煙中遙認鳥知還

錢塘江

潮頭駕月衝殘夢
水色浮空送峭寒
十幅輕蒲連夜發

不知身到海門山

石倉歷代詩選卷一百八十三

欽定四庫全書

石倉歷代詩選卷一百八十四

明 曹學佺 編

宋詩六十一

胡宏

題上封寺

百年身似客浩蕩世間遊
入望青山好夢魂偏我留
我家巫山十二峰浮江直
過巴陵東瀟湘水與蒼梧
通環

遶衡嶽青冥中扁舟白雲不可度杖藜臘屐乘春風山
光浮動可攬結雲舒霞卷飛煙虹深巖大壑翠巘巘足
力已到心無窮羣峰迤邐勢不競上盡祝融五千仞祝
融峰高天更高太空人世如牛毛風雲萬變一瞬息紅
塵奔走真徒勞

觀建安七子詩

作文發妙理經國勵遠圖遊目建安中才子足歡娛西
南落漢日楊益奮兩隅山河裂地軸星象分天衢八師

遇有姚萬世垂楷模一元均大化五服擁皇都悠悠彼
七子流光失其孚飛觴宴婉孌鼓瑟吹笙竽主人敬愛
客徒爾相揚揄魏祚竟不長貽謀止斯須逡巡數十年
犬羊羶八區所以漢高帝嫚罵輕文儒

和江子玉

無奇試學居盤谷誰信斷絃膠可續湘天冷落數家村
曩時曾在旌麾沐潺湲堦下碧溪橫柳靜風微幽意足
知君文武濟時才舊時軍律寒生粟文書脫略是人師

應有魏昭能換粥我無真樂送芳年
悵望顏回屢空腹
淒涼指日秋風高願更同來寫心曲

西林寺廓然堂有懷

超然峰頭秋氣清廓然堂延秋月明
我乘清秋弄明月
中有所感思冥冥峰勢凌蒼穹上有煙林封去天不盈
尺路斷心忡忡虛名過耳如松風

同伯氏還鄉

江村沙暖萋萋蒿長味比枸杞新
甘香茁茁荻芽生近渚

紫花臺菜初未嘗白羊烏獐俱在牧茆舍竹籬真故鄉
人生未必須富貴萬事且願身康強徑買官場舊醕酒
共醉春風殊未央

桃源行

北歸已過沅湘渡騎馬東風武陵路山花無限不關心
惟愛桃花古來樹聞說桃花更有源居人共得仙家趣
之子漁舟安在哉我欲乘之望源去川源遠近蒸霞開
一片隨水從東來及晨徧覽三春色莫使風雨空莓苔

題法輪寺

春色初收夏氣清
路分松檜入崢嶸
深盤峻嶺千峰下
遠抱瀟湘一綫明
大衆總迷身在處
三關除却道方平
山林若是有情住
何異紅塵爭利名

石倉歷代詩選卷一百八十四

欽定四庫全書

石倉歷代詩選卷一百八十五

明 曹學佺 編

宋詩六十二

林光朝

送別湖北漕李秘監仁甫

文字耿煙雲過眼徒浩浩所有未見書惜哉吾已老子
雲客長安陳迹如一掃同叔向來人我生苦不早亦聞

青城山斯翁為有道瞿塘不可上秋夢長顛倒白日來
西崑一見自應好縱譚百代前至竟非枯槁多為開口
笑明月生懷抱黃鶴有高樓恍如事幽討攬轡逢道州
聽書下下考周南勿留滯掇拾供史藁分手重酸辛瑤
瑤衆所寶十日不得面何為太草草

送別姚國博知處州分韻得綠字

銅盤白露下松桂淨如沫
變彼菊花叢朔風吹醺醪
長安多別離此別苦不足
人物如史君容易等潘陸
一自

東海頭清颺起謠俗館下欲何言
聯翩如破竹功名不徒爾無乃相迫
逐雙日訪延英行矣公勿卜括蒼煙
雨前寒光貫巖腹大叫出銀甕邂逅
聚百族要携三月糧所厭惟一翁幸
心忽開張何曾畏笑僂單父勿長吁
來者猶可續道旁有抵璧天下輕結
綠一夕洲渚言令我沈心曲

甲午

仙掌秋容媚銅樓曉色遲倚蘭成漢
殿芭竹入周詩鼎

卜卿雲合郊禋彩仗移隆興乾道日建武永平時詹事
開新府長秋綴舊儀禮經猶下問易道本生知世子家
為法文王我所師誕彌重海潤清賞一天慈九月黃金
藥千齡白玉卮遙開三殿喜高頌走天涯

石渠行送別福建參議李著作器之

我來石渠五十六雙鬢如蓬腰未曲豈為健筆有徐庾
自數來時六十五誰解辛苦續子虛長安有客四十餘
已成老翁不肯去青藜當戶夜讀書東觀丈人起遐想

無為歲月空踟躕去作諸侯老賓客可為綠水兼紅蕖
我家東下纔百里釣螺一曲清無滓草堂為築荔枝斜
濯錦江頭有如是子思子方道為尊南國佳人如秋雲
不知公侯有朱箔要問常州李著作

資中奉寄臨邛守宇文郎

銅駝陌上生秋草前者刻石今如掃儋邊半紙半模糊
下牀三日成悲惱蒼史萌芽何可見要從筆意生秦漢
欲將奇字問何人所守一家如小篆是中變列隨形模

鐘鐻鼎鬲匿盤盂如何西京到魏晉
摻盡蒼崖惟此書即令原隸見顛末
仍于畫上分銖鎰燕然有年固可紀
筆勢豈得先黃初中郎袖手欲無作
正始不逮況其餘幸哉一見俱抵掌
翩翩如反古石渠且說金陵佛屋何
年燈晉分隋張猶青熒忽聽荒雞還
自起資中之刻不徒雨

鞭春行

輓轡冒寒田雀飢江梅落蛙兔脚肥
枯腸一夜轉雙轂

眼光吹上蝦蟇衣巖腹新晴山鬼哭女媧墳外春風歸
繭村紙簾大如席柝柝杖藜金雀飛

次韻奉酬趙校書子直

雁塔新題墨未乾去年燈火向秋闌趣看天祿青藜杖
怕着王孫紫綺冠好在三山尋浩渺何如一紙問平安
觚稜放月無人到玉糝初成許共餐

九日同出真珠園再用前韻

來自清源葛已覃君王問獵我猶堪百年耆舊如重見

九日登臨得縱談才子不知汾水上仙人長在大江南
明珠照夜應無數應是層波更好探

送別傅郎中安道持節閩中

忽然鄉思若為收莫到三茆最上頭二月東甌看負弩
一天南蕩想行舟過家上冢從今數落絮飛花合畫遊
料得甘泉來奏計定應前席莫遲留

閏月九日登越王臺次韻經畧敷文所寄詩

閒陪小隊出山椒為有吳歌雜楚謠縱道菊花如昨日

要看湯餅作三朝千重嶺海供橫槩一帶風煙聽采樵
憑仗折衝如此好不應東去更乘軺

前歲過真陽初識子欽今道出曲江不忍遽分
手偶成長句以志兩處山川人物之勝亦稍
慰別來耿耿耳

秋崖一夕卷炎蒸那更揮斤為斲冰碧落舊尋燒藥竈
白芒長對讀書燈相期大庾何多日似出浮屠向上層
縱有分張吾未老定從臺閣看飛騰

次韻賀丘國鎮致仕

桃花流水是家鄉
洛下才名四十強
自有赤松堪辟穀
那能白首更為郎
紫頭貝葉忘言久
江上蓴羹引興長
邂逅却成香火社
好將詩句細商量

挽李制幹子誠

文字紛紛更問兵
秋燈束髮尚青熒
便令三子成門戶
却許諸孫說典刑
隔水忽傳朝露曲
行人長數夕陽亭
河東健筆惟諸薛
梅子崗邊為勒名

代陳季若上張師

一樣官儀漢代新
乘時大手與經綸
東南自古衣冠地
桐栢山前淮水春

長陪綵仗下蓬萊
萬歲聲中霽色開
自是北門須卧護
雙旌迢遞日邊來

直甫見示次雲乞豫章集數詩偶成二小絕因
以自喻

脩水佳人白玉欄
花前何似妾容顏
從來未省傷春意

猶是樓頭畫遠山

挽方通判良翰

得錢終日走燕市抱膝經年動越吟想得長安西望眼
只應黃鵠見歸心

達者淵明自挽歌新墳數尺奈愁何雞林賈客無從問
收拾篇章有幾多

九死穹廬我未甘後來勿使隴西慚明時節義多傳述
柱下何人是老聃

哭徐刪定德襄

脩文巷裏暮春前
欲上旗亭問客船
忽有短牋無寄處
渙梁却在淚痕邊

哭伯兄鵲山處士蒿里曲

竊觀之近古
葬顯者則歌薤露
又有蒿里之曲
施諸閭巷
乃取鵲山號哭之聲作是曲

桐棺三寸更何疑
却取江楓短作碑
惟有一般蒿里曲
長簫欲斷更教吹

石倉歷代詩選卷一百八十五